

«In lexicon politic ambulat»

Partida socialdemocratica dal Grischun

DA GION NUTEGN STGIER / ANR

■ **Cun sa dulzar da lur sutgas han ils socis da noss chantun prendì cumià da l'anteriur cusseglier guvernativ Martin Jäger. 40 onns politica activa saja bain ina prestaziun remarcabla, è vegnì ditg tar il di da partida da la ps grischuna ad Aschera.** *Philipp Wilhelm*, il president da la ps da noss chantun, ha ditg che per il di da partida saja la direziun sapientivamain sa decidida per Aschera. Qua haja l'anteriur cusseglier guvernativ *Martin Jäger* sias ragischs politicas ed er fatg il fundament per sia carriera politica briglianta. El saja stà in lexicon politic ambulat, ha punctuà Wilhelm. Jäger saja er stà in um cun in profil politic e cunzunt er ina persuna cun ina gronda savida da l'istorgia generala. Cun sa retrair da la politica activa possia el ussa prender dapli temp per excursiuns cun il velo e giudair flurs ed utschels. Jäger conuscha bunamain mintga num da las flurs ed er dals utschels, ha menziunà il president da la ps chantunala.

Cun corp ed olma politicher

La laudatio uffiziala per il cumià da cusseglier guvernativ Martin Jäger, quella ha tegnì *Christina Bucher-Brini*, ella ch'è stada intgins onns cun el en il parlament grischun. Jäger saja stà politicher cun corp ed olma ed el saja s'engaschà per la politica cun bler cor. Bucher-Brini ha er accentuà che Jäger saja na be stà ina persuna da la politica, na, er in bun ami e cunzunt er in char carstgaun. El haja er



Il president da la ps grischuna, il cusseglier guvernativ partent e ses successur: Philipp Wilhelm, Martin Jäger e Peter Peyer (da san.).

FOTO G. N. STGIER

contribuì bler a la societad sociala. Quai conferma er che l'anteriur cusseglier guvernativ saja anc adina in jodlader activ, in chantadur passiuà ed er in bun musicist.

In ami da la plurilinguitad

Jäger saja stà gugent minister da cultura, sco anteriur scolast haja el lur er adina pruvà en la regenza ed en il parlament chantunal da far il meglier per la scola e

la furmazion. Ses plaschair e sia fascinaziun tar la politica sajan er sa mussads tar las debattas per la lescha da scola e da la cultura. Jäger saja stà in grond ami da la plurilinguitad da noss chantun e losch

saja el er adina stà da la gronda multifariadad culturala da tut las regiuns da noss chantun.

Adina stà in promotur da l'egualitad

Bucher-Brini ha er ditg che Jäger saja adina stà in promotur da las dunnas. El haja er adina dà paisa a l'egualitad tranter um e dunna e quai fetschia el segir er vivanant. A cor haja el er adina gi il sport ed er adina sa legrà dals success dals sportists grischuns tar occurrenzas internaziunalas. Jäger saja però er stà in politicher resistent ed haja magari er fitgà sia testa. Sco gia menziunà è ussa la carriera politica da Jäger a fin e quai sunter ch'el è sta 26 onns en il cussegl grond, 12 onns cusseglier da la citad da Cuira ed otg onns cusseglier guvernativ.

Duas giadas Gea ed ina giada NA

Tar il di da partida han ils preschents er decidì davart la parola per las votaziuns federalas e la votaziun chantunala dals 19 da matg 2019. Per la votaziun da la refurma fiscal e la finanziaziun da l'AVS han ils umens e las dunnas da la ps decidì cun 39:8 vuschs da sustegnair quella refurma. Unanim han ils preschents decidì da dir Gea a la realisaziun d'ina midada da la directiva da l'UE davart las armas. Per dapli material da discussiun ha lura chatschunà la votaziun chantunala, l'iniziativa che vul dismetter la chatscha supplementara. La fin finala han ils socis concludì da dir NA a quella iniziativa e quai cun in resultat da 38:7 vuschs tar tschintg abstenziuns.